
МУАММОЛАРГА ЕЧИМ ТОПИЛДИ

25 июнь куни Фарғона вилояти ҳокими Шухрат Ғаниев Ўзбекистон туманида сайёр қабул ўтказди. Унда фуқароларнинг мурожаатларига шу ернинг ўзида ечим топилди.

- Дўнгсарой қишлоғимиздаги 39-мактаб дастур асосида таъмирланиб, 160 ўринли янги ўқув биноси қурилмоқда. Бундан жуда хурсандмиз, - деди Соҳибахон Маҳкамова. - Қишлоғимизда болалар боғчаси йўқ. Шу масалада ёрдам берсангиз.

- Ёшларимиз - бизнинг келажагимиз. Соғлом, баркамол авлодни вояга етказиш масаласида ҳар қанча эзгу ишларни бажарсак арзийди, - деди вилоят ҳокими. - Мактабгача таълим бошқармаси мутасадди раҳбарлари ҳозирок ўз ҳулосаларини беради. Сиз бугунги қабулдан албатта рози бўлиб кетасиз.

- Оилавий тадбиркорликни йўлга қўйиб, болалар оёқ кийимлари ишлаб чиқаряпмиз. 13 та иш ўрни яратганмиз. Маҳсулотларимиз сифати чет элникидан қолишмайди. Ички бозорда харидоргир, - деди “Фаровон келажак” маҳалла фуқаролар йиғинида яшовчи ёш тадбиркор Жасурбек Абдусаматов. - Тадбиркорлик фаолиятимизни ривожлантириш учун 300 млн. сўм миқдорида кредит олмоқчимиз.

- Сиз каби ғайратли, ёш тадбиркорлар – Фарғонанинг ислохотчиси, - деди вилоят ҳокими. - Бизнес лойиҳангизни тайёрлайверинг, кредит албатта ажратилади.

Сайёр қабулга ташриф буюрган 62 нафар фуқаролар томонидан йўлни таъмирлаш, ишга жойлашиш, кредит ажратиш, электр энергияси, ичимлик суви таъминоти, мулкый муносабатлар, оилавий масалалар ва уй-жой билан боғлиқ муаммолар айтилди.

Кўтарилган масалалар бўйича вилоят, туман бошқарма, муассаса ва ташкилот раҳбарларига аниқ топшириқлар берилиб, ижроси назоратга олинди.

Фарғона вилояти ҳокимлиги Ахборот хизмати Facebook, Telegram, Веб сайт, YouTube

2020-06-26 13:02:08